

النص المسرحي

صابر و راضي

Saber w radi

2023

من فصل واحد

باللهجة العامية المصرية

تأليف

بسام حسن

طبعة اولى اكترونية

جميع الحقوق محفوظة للمؤلف

شخص الحكاية

- ١_ عوض ساعي_ رجل تخين - ستيني العمر.
- ٢_ أنسة خديجة موظفة الموارد البشرية HR - محجبة - ثلاثينية العمر.
- ٣_ صابر شاب ثلاثيني العمر - ممشوق القوام - معتدل في ملبسه.
- ٤_ راضي شاب عشريني العمر - قصير - ملابسه غير مهندمة والوانه غير متناسقة .
- ٥- استاذ سعيد مدير ؛ رجل خمسيني العمر - مهندس - يرتدي نظارة طبية.
- ٦_ شيري فتاة في العشرين من عمرها
- ٧- عطيات
- ٨- هيفه
- ٩- فيولا

اسم المسرحية : صابروراضي

لغة الحوار: اللهجة العامية المصرية

المتلقي المستهدف: كل الطبقات

المكان : في احدي الوزارات والهيئات الحكومية

الزمان : العصر الحالي

المشهد الأول

بداية العرض:

(تفتح الستارة.. علي حجرة مكتب شؤون العاملين في احدي الوزارات في صدر المسرح لوحة مكتوب عليها مصلحة حكومية و يوجد بها مكتب و ثلاث كراسي خشبية ودولاب زجاجي لحفظ الأوراق و غرفة مكتب المدير العام من ناحيه اليسار وغرفة البوفيه ناحية اليمين)

عوض : (يظهر لنا عم علي وهو جالس وممسك بيديه الجورنال ويقرأ بصوت مسموع وهو يقلب صفحات الجورنال)

بدء الاختبارات والمقابلات الشخصية للسادة المتقدمين لشغل الوظائف الفنية التي أعلنت عنها الشركة بالموقع الإلكتروني وبدأت اللجنة أعمالها بمراجعة واستلام المستندات واستيفاء البيانات المطلوبة

وسيتم قبول المتقدمين علي وظائف الهندسة والعلوم والفنيين والعمال حرفيين بناء علي الشروط المطلوبة والذي سبق الإعلان عنها كالسن ونطاق السكن والمؤهلات المطلوبة وموقف التجنيد ثم إجراء الاختبارات التحريرية والعملية.

(يرمي الجورنال دون أن يكمل قراءة الأخبار وقد اصابه الدهول و القرف)

عوض : (للجهمور) هه تقاليع ماسخه فين ايام زمان الواحد اما كان يعوز يشغل اه كان ينزل يدور ويتعب ويكد ويبذل مجهود لحد ما ربنا يعطر في شغلانه والتانيه والتالته .. اه انما شباب اليومين دول لا يعرفوا حاجة عن التعب والشقه .. الواد من دول يعقد قدام المدعو اللي اسمه الننت ده ويفر كده في شاشة التليفون التاتش قال ايه بيدور ع شغل .. ويقولك رايح قال ايه اعمل انترفيو .. لا حول ولا قوة الا بالله

آنسة خديجة : (من الخارج) يا عوض .. يا عوض

(تدخل الآنسة خديجة)

عوض : اذيك يا آنسة خديجة

آنسة خديجة : زي الفل يا عم عوض ده انت رايق أهو .. وعامل فيها رجل مثقف و بتقرا الجرايد زي بتوع التلفزيون

عوض : (بالاهتمام) ده إعلان عن شغل في الجورنال.

آنسة خديجة : بدور علي شغل يا عم عوض ولا إيه؟ عاوز تمشي وتسيبنا وتروح علي
فين ؟

عوض : انا قاعد علي قلب المدير بتاعنا.

آنسة خديجة : طيب اية الحكاية؟

عوض : مش انا اللي عايز شغلانة يا استاذة.

آنسة خديجة : اومال مين ؟

عوض : ابني الكبير

آنسة خديجة : ماله ابنك .. مش بيشتغل ولا ايه.

عوض : قاعد في البيت جنب اخواته البنات .

آنسة خديجة : إزاي قاعد في البيت .. بيعمل ايه؟

عوض : نايم طول النهار.. وقاعد ع القهوة طول الليل .

آنسة خديجة : بيعمل ايه بس ع القهوة ؟

عوض : بيلعب دومينو وطاوله وبلاي ستيشن .

آنسة خديجة : وبياخد مصروفه الشخصي منين ع كده .

عوض : من العبد الفقير لله .

آنسة خديجة : متزعلش يا عم عوض.

عوض : ياربي الاقيها منين ولا منين

آنسة خديجة : طيب ما ينزل يدور على شغل زي كل الشباب.

عوض : وحياه ربنا المعبود ..كعوب رجله دابت من اللف .. علشان يلاقي اي شغل.

آنسة خديجة : وملقاش شغل في اي حته ؟

عوض : لف كعب داير .. بس لسه النصيب مجاش ..كله قسمه ونصيب .

آنسة خديجة : ع الاقل علشان يساعدك في مصاريف البيت و يقف جنبك في جواز
أخواته البنات .

عوض : مش عاوز يساعديني.. عاوز ربنا يكرمه علشان يعرف يساعد نفسه ويكون مستقبلي.. مش عاوز حاجه منه .. في الزمن ده الاب والام هما اللي يساعدوا عيالهم .. في الظروف الصعبة اللي عايشنهما.

أنسة خديجة : طيب ماتكلم المدير بتاعنا في الموضوع ده .. وهو يحاول يدخله في المصلحة في اي شغلانة .

عوض : سكوتى هو انا ما قلتلكيش

أنسة خديجة : لا ماقتليش

عوض : والنبي ما قلت لك

أنسة خديجة : والله ما قلت لك والله ما قلتلى

عوض : اه يقطعنى

أنسة خديجة : ما تخلص يا عم عوض

عوض : اه انت بتتحولى كل شوية ليه .. ح اقولك .. كلمته والله اكثر من مره .. قبل ما اطلع انا ع المعاش ومعرفش أدخله المصلحة .

أنسة خديجة : وبعدين ؟

عوض : قالي خير خير .. وكبر دماغه بعدها.. ومش عارف اعمل ايه ؟

أنسة خديجة : خير خير

عوض : انتى كمان

أنسة خديجة : مش قصدى والللة .. قصدى يعنى ان ربنا هيكرمه ان شاء الله

عوض : سيبك انتى من النكد ده .

أنسة خديجة : متزعلىش .. ربنا يرزقه ويفتح عليه وبعدين.....

عوض : (مقاطعا) حضرتك عارفه فيه ايه النهاردة في الإدارة ؟

أنسة خديجة : (تضحك) خير يا عم عوض. على علمك والله

عوض : في حاجة غريبه .. وزحمة في المكاتب.. وناس كتير بتسأل علي المدير.

أنسة خديجة : (ببرود) اكيد عارفه.

عوض : يا بنتى عيب ده انا شعرى ابيض (يخفض من صوته) لو حضرتك مش عارفه..
مين اللي يعرف.. انتي موظفة شؤون العاملين بالمصلحة

آنسة خديجة : انت مش حتسكت غير لما اقولك كل حاجه. (تضحك)

عوض : والله انتي فهماني غلط .

آنسة خديجة : انت مظلوم وأحنا الظالمين .

عوض : (ينظر في ساعته) اصل المدير العام بتاعنا امبارح ساعه الانصراف .. بلغني اجي
الشغل بدري ساعتين عن الميعاد .. وانضف المكاتب .

آنسة خديجة : علشان عندنا مقابلات النهاردة لناس مقدمه على شغل في المصلحة .

عوض : عندنا في المصلحة ديه ؟!

آنسة خديجة : الوزارة بتاعتنا نزلت اعلان شغل في كل الجرايد الحكومية و أعلنت عنها
بالموقع الإلكتروني بالوزارة

عوض : ع كده احنا محتاجين في المصلحة موظفين جدد ؟

آنسة خديجة : (بصوت مهزوز) علشان نكمل احتياجات مشروعات حياة كريمة
بالمحافظة

عوض : علي كده ناس كتير قدمت علي الوظائف ديه ؟

آنسة خديجة : العدد اللي قدم للوظيفة حوالي ٣٠٠٠ واحد في اسبوع

عوض : العدد في الليمون

آنسة خديجة : ولسه كمان باقي العدد علي قايمه الانتظار .

عوض : وكل ده ح يشتغل ؟ .. مش معقول .

آنسة خديجة : لا طبعا .. ماهو فيه امتحانات للقبول و حيقبلو عدد معين .

عوض : كمان فيه امتحان.. شغل فاخر من الاخر .

آنسة خديجة : حنبء الاختبارات والمقابلات الشخصية للناس المتقدمه لشغل
الوظائف الفنية والإدارية .

عوض : (بصوت عالي) ليه كل وجع الدماغ ده ؟

أنسة خديجة : (تبتسم) شغل حكومة.. واللوائح .. ده في لجنة من ادارة النزاهه جاى
تشرف على الامتحانات.

عوض : النزهة .. اللى دخل جنينه النزهة بتاعت الحيوانات فى الشغل بتاعنا .

أنسة خديجة : ادارة النزاهة .. مش النزهة

عوض : يعنى ايه نزاهه.. يا استاذة.. معرفش معناها ؟

أنسة خديجة : يعنى انا اللي عارفه .. احنا عبد المأمور يا عم عوض

عوض : و الامتحان عبارة عن ايه ؟

أنسة خديجة : إمتحانات شفوي على امتحانات تحريري كده يعنى

عوض : اه .. وعلى كده بقى اللى مش ح يتقبل حياخد شهادة (ضاحكا)

أنسة خديجة : وبعدين بقى فى خفة دم كبار السن دى على الصبح .. روح يا عم عوض ..
اتكل ع الله كمل شغلك .

عوض : (لنفسه) البت دى اكيد برج الثور ..(للأنسة خديجة) طيب اروح اكمل شغلي ..
علشان ورايا شغل كتير يا استاذة (يهيم بالخروج).

(يدخل استاذ سعيد)

أستاذ سعيد : صباح الخير يا خديجة

أنسة خديجة : صباح النور جناب المدير

(تسمع ضجه خارج المكتب)

استاذ سعيد : (يشعل سيجارة) إيه الزحمة اللي بره ديه يا خديجة ؟ دى ما بقتش
شركة .

أنسة خديجة : يا استاذ سعيد دول الناس اللي قدمت للوظايف اللي تم الإعلان عنها
علي النت .. واتصلنا بهم امبارح .. علشان الانترفيو بتاع النهاردة مع حضرتك .

أستاذ سعيد : عال .. عال

أنسة خديجة : تؤمر حضرتك بأي إجراءات نعملها قبل بداية المقابلات الشخصية .

أستاذ سعيد : خلي عوض ينظم الناس اللي واقفه برة بدل الزحمة اللي علي الفاضي
ديه.. الشكل العام وحش ..بلاش تجمهر.. ويدخل اتنين اتنين .

أنسة خديجة : ماتقلتش يا ريس .

أستاذ سعيد : المكتب كله بايظ .

أنسة خديجة : معلش .

أستاذ سعيد : لا .. دي فوضي .

أنسة خديجة : حاضر .. حندخل اتنين اتنين .

استاذ سعيد : (أمرأ) اما عن استمارات الأختبارات للتقديم في للوظايف قيمه ١٠٠ جنية لصالح صندوق العاملين بالوزارة من المتقدمين للعمل .

أنسة خديجة : حاضر .. حاضر

أستاذ سعيد : لكل وظيفة فاضيه أو تخصص مطلوب في الشغل .

أنسة خديجة : (في حيرة) إزاي يا فندم .

أستاذ سعيد : (شارحا) يعني يا بنتي.. مثلا لو المتقدم للوظيفة عاوز يقدم في كذا وظيفة شاغرة عندنا .. حق مكفول له بالقانون .. بس لكل تخصص او وظيفة علي حده.. ملف خاص واستمارة جديدة

أنسة خديجة : ما عنديش تعليمات بخصوص الموضوع دا.

أستاذ سعيد : (بنغمة رسمية) جت اشارة تلفونيا وواتس من مكتب سكرتارية الوزارة النهاردة الصبح.

أنسة خديجة : تمام يا ريس .

أستاذ سعيد : (أمرأ) التعليمات ديه من السلطة المختصة لازم تنفذ من غير نقاش

أنسة خديجة : علي كده.. حنلم فلوس من الناس

أستاذ سعيد : (في إعتراض) لا طبعاً.. عاوزنا نتحول للشؤون القانونية و نروح نيابة إدارية.. و سين وجيم وكلبوش

أنسة خديجة : طيب والحل يا استاذ سعيد؟

أستاذ سعيد : موجود .

أنسة خديجة : طيب نعمل ايه بس؟

أستاذ سعيد : الحل هو الدفع يكون اكتروني .

آنسة خديجة : ازاي و فين ؟

أستاذ سعيد : الدفع عن طريق الايداع في البنوك الحكومية او مكاتب البريد تحت رقم حساب صندوق العاملين بالوزارة

آنسة خديجة : تمام يا ريس

أستاذ سعيد : التطور الطبيعي للحاجه الساعه (ضاحكا)

آنسة خديجة : حاضر يا فندم .. حبلغ الناس بالمطلوب قبل الأختبارات .. مش عاوزين دوشه من الناس ووجع قلب.

(تدخل هيفه الي المسرح)

هيفه : (بتردد) لو سمحت.. لو سمحت يا عمو .

استاذ سعيد : ايون

هيفه : (بخوف) عاوزه أسأل عن حاجه.

آنسة خديجة : اتفضلي يا حبيبي

استاذ سعيد : انتي خايفه كده ليه؟

هيفه : مش خايفه ولا حاجه .

آنسة خديجة : أسألي طيب .

هيفه : هنا فيه حيتعمل انترفيو شغل .

استاذ سعيد : تقريبا.

آنسة خديجة : انتي جايه تسألي عن شغل يا حبيبي.

هيفه : (ترتعش) أه .. عاوزه أسأل.. عن الإعلان .

آنسة خديجة : المؤهل إيه؟

هيفه : معهد فني تجاري سنتين

الآنسة خديجة : تمام.. أسمك إيه.

هيفه : إسبي..اسبي أنا

أستاذ سعيد : يا نهار اسود .. ديه نست إسمها من أولها .

الآنسة خديجة : مش عارفه اسمك.. انتي كويسه.

استاذ سعيد : يا خديجة.. انا راجل صاحب مرض . مش حقدر استحمل.

هيفه : (في دلح) إسهي هيفه.

استاذ سعيد : تقصدي هيفاء زي هيفاء وهي اللبنانية.

هيفه : لا مش زي هيفاء وهي المغنيه

أستاذ سعيد : يعني إيه؟

هيفه : هيفه.. هيفه.

أستاذ سعيد : تقصدي هيفه جاي من الهيافه والعبط.

هيفه : (بحزن) بس انا مش عبيطه ولا هيفه ..ده مجرد إسم . انا زي الفل.

آنسة خديجة : متزعليش يا حبيبتي.

استاذ سعيد : عادي .. بتكبريش الموضوع يا آنسة.

هيفه : تعبت .. ومش عارفه اعمل إيه .

آنسة خديجة : متعمليش حاجه .. ملكيش ذنب.

هيفه : (في ملل وانكسار) فعلا ..مفيش حد بيختار ابوه ولا امه ولا عيشته ولا حتي إسمه ولا حتي شهادته.

الأستاذ سعيد : يا بنتي.. فيه اسامي عائلات مشهوره زي عيله العبيط و عيله الجحش .. وبقث فاتحه خير عليهم .

آنسة خديجة : صح يا أستاذ سعيد

أستاذ سعيد : (يلقي عقب السيجارة علي الأرض وبيتعد عن خديجة وهيفه) أنا في المكتب.. عاوز عوض يدخل ليا القهوة بتاعتي (يخرج)

آنسة خديجة : ليكي في الحسابات يا هيفه.

هيفه : باين كده

آنسة خديجة : رجعنا تاني .. لا حول ولا قوة إلا بالله العظيم

هيفه : ليا.. بعرف في الحسابات والله.

آنسة خديجة : طيب ح بيان مع الامتحان .. يلا اتفضلي املئ الابلكيشن واستنى بره

هيفه : حاضر (تسيرلتخرج)

آنسة خديجة : (بعده) دخل الى بعده يا عم عوض .. ابتدينا اليوم من اوله

(يخرجان)

(اظلام)

المشهد الثاني

(تفتح الاضياء على الانسة خديجة و يدخل صابر)

صابر: السلام عليكم يا مدام

آنسة خديجة : (في غضب) آنسة من فضلك مش باين ولا إيه.

صابر : آسف يا استاذة

آنسة خديجة : مفيش مشكلة

صابر: (برعشة خفيفة) اتصلوا بيا .. وبلغوني عن ميعاد الإمتحان النهاردة

آنسة خديجة : ممكن ال CV

صابر: اتفضلي حضرتك (يعطيها ورقة CV)

آنسة خديجة : انت جاهز بالأوراق

صابر: انا تقريبا وزعت ال CV بتاعي علي البلد كلها ومفيش حد قالي انت فين ؟

آنسة خديجة : يا سلام

صابر : أنا رامي ال CV في كل الشركات والمصالح الحكومية والقطاع الخاص

آنسة خديجة : (تقرأ الورقة) انت حاصل على مؤهل عالي

صابر: تقدير إمتياز

آنسة خديجة : مش معقول

صابر: الأول علي الدفعة

آنسة خديجة : (في استجواب) متعينتش في الكلية ليه؟ كأوائل الخريجين زي كل الكليات

صابر: (في ألم) اتاخذ الثاني والثالث للتعينين في الكلية

أنسة خديجة : إزاي ؟

صابر: (يستغرق في التفكير) أبناء عاملين

أنسة خديجة : مش معقول

صابر : ده اللي حصل والله

أنسة خديجة : انت خريج حديث ولا دفعه قديمة

صابر : (يأخذ نفس عميق) معاي بكالوريوس إقتصاد وعلوم سياسية جامعة القاهرة و

دفعة قديمة ويعمل دراسات عليا

أنسة خديجة : طيب ليه مشغلتش في وزارة الخارجية ؟

صابر: غاوي فقر .. او يمكن العيب فيا .. الله اعلم

أنسة خديجة : يا سلام

صابر: الحقيقة قدمت من فترة في إختبارات وزارة الخارجية.. علشان التحق بالسلك

الدبلوماسي

أنسة خديجة : شيء جميل

صابر : لا جميل ولا حاجة .. نجحت في التحريري ورسبت في الأختبارات الشفوي و

المقابلات بتاعت الوزارة

الانسة خديجة : رسبت ليه؟

صابر: علشان خريج مدارس إعدادي و ثانوي حكومي مش خريج مدارس ناشونال

وانترناشونال

أنسة خديجة : (وهي تنظر إليه في حسره) وتفرق إيه يعني؟

صابر: فرق كبير أوي

أنسة خديجة : بس كده؟

صابر: (في حزن) في حاجات تانيه كتير .. زي أبويا رجل غلبان علي قد الحال

أنسة خديجة : تقصد مواطن عادي بسيط زي أغلبية البشر .. أهالينا من الناس

الطيبين

صابر: (بهدهوء) زي تلت تربع الناس في بلدنا من الطبقة العاملة مش من صفوة المجتمع او من العائلات الكبيرة

أنسة خديجة: مش ممكن.. يا دي الخيبة

صابر: (بقوة) حصل كده والله .. بالرغم اني كنت ناجح في كل الأختبارات في مجال التخصص وفي إمتحان اللغة الأجنبية.. علي فكرة انا درست اللغة الإنجليزية من برامج إذاعة ال بي بي سي البريطانية ومن الفرجه علي افلام السينما الأمريكية برة الدراسة و خدت كورسات الكمبيوتر والبرامج من مراكز الثقافة الجماهيرية في وسط البلد علي قد الايد

أنسة خديجة: (بنظره إعجاب مع ابتسامة) انت شاب نموذجي .. مجتهد وشاطر

صابر: (بحزن) بس انا موجود هنا .. مش هناك في الخارجية

أنسة خديجة: اللي حصل ليك ده شيء مش متوقع

صابر: (وقد انحدرت دموعه) أنا بصراحة كان هاين عليا انتحر

أنسة خديجة: وتموت انسان كافر.. وحد الله .

صابر: لا إله إلا الله (في يأس) علشان كده عايز اي شغلانة .. اي حاجه

أنسة خديجة: مينفعش .. طبيعة الشغل المعلن عنه في الجورنال.. بعيد جدا عن تخصصك في الكلية.. فيها ظلم ليك

صابر: (بمرارة) كله شغل .. انا خلصت الكلية من حوالى ١٣ سنة .. ولحد دلوقتي مش لاقى اي شغل

أنسة خديجة: (في حيرة) بس مش حينفع .

صابر: (بحزن) كله محصل بفضه.. احمد زي الحاج احمد .

أنسة خديجة: للاسف.. كلامك صحيح

صابر: (مستذكرا في حزن) خلصت الدراسة في الجامعه علي ٢٣ سنة وبعدين دخلت الجيش .. طبعاً خدمة للبلد .. ده واجب وطني.. مقدرش اقول حاجه عنه .. وطلعت من الجيش قدوة حسنه.. وقولت انزل اشوف سوق العمل و اشتغل بشهادتي عرفت ان البلد مش بلد شهادتات .. بلد حاجات تانيه مكنتش عارفها قبل كده

أنسة خديجة: معلىش

صابر: (رافعا يديه) إحنا لينا رب كريم

الآنسة خديجة : (بلطف) طيب استني كده شويه . وربنا يوفقك ان شاء في الإمتحان
وتشتغل معنا

(يخفف ضوء المسرح في الخلفية ويسلط كشاف الضوء علي صابر)

صابر: (يوجه كلامه للجمهور) حضرتكم انا بدور علي شغل يا جماعه الخير عندي ٣٥
سنه ومنتخرج من كلية اقتصاد وعلوم سياسية جامعة القاهرة .. ومعايا إعفاء نهائي من
الجيش وورقي جاهز ومستعد لاي شغل المهم اشتغل لو من دلوقتي

سوبر ماركت

فندق .. مساعد شيف

محل منظفات

مطاعم فرايد تشيكن

مكتبه

استوديو تصوير

مراقب كاميرات

اي شغل من فضلكم وجزاكم الله كل خير

(يضاء المسرح في نفس المكان علي صابر)

(فترة صمت قصير)

(يدخل أستاذ سعيد)

أستاذ سعيد : فين القهوة اللي طلبتها ؟

آنسة خديجة : حاضر..حاضر يا فندم

أستاذ سعيد : (لصابر) انت يا اللي واقف هناك

صابر: (بدون رد وينكمش علي نفسه)

أستاذ سعيد : انت يا أخ

صابر: أنا.

أستاذ سعيد : (ينظر إليه باحتقار) ايون انت مين .. بنادي عليك من بدري .. مش سامع
.. انت أطرش

صابر: صباح الخير يا فندم

أستاذ سعيد : صباح الفل.. مين انت؟

صابر: (في خوف) أنا.. انا

أستاذ سعيد : (محدقا فيه) انت بشتغل معنا في القطاع .. موظف عندنا يعني

صابر: لا .. يا فندم

أستاذ سعيد : طيب.. او مال عاوز إيه؟

صابر: لا .. ولا حاجه

أستاذ سعيد : مش فاهم .. انت بتعمل إيه هنا ؟

أنسة خديجة : (للأستاذ سعيد) يا فندم ده شاب كويس جدا و من ضمن المتقدمين للشغل و حاصل علي شهادة بكالوريوس إقتصاد وعلوم سياسية بتقدير ممتاز

أستاذ سعيد : (لصابر) عاوزين شهادة خبرة .. مش شهادة تخرج

صابر: (بخيبة امل) معيش شهادة خبرة يا فندم

أستاذ سعيد : لا يا شيخ.. طيب حنشوف الموضوع ده .. ربنا يسهل (يرن هاتف أستاذ سعيد) دقيقة واحدة يا بني وحكمك باقي الكلام معاك (يخرج الهاتف من جيبه) استر يارب (يرد على الهاتف)

[الو .. مين .. نعم معالي الباشا .. صباح الورد والياسمين يا فندم .. اخبار صحتك ايه يا فندم.. ده شرف لي مكالمة حضرتك ووسام علي صدري وشهادة تقدير وسعادة لي لا توصف.. فعلا فيه تقديم للشغل في الوزارة و الوظائف متاحه للكل في شفافية وعدالة حكون متواجد في المكتب وفيه انتظاره و اعتبر حضرتك الموضوع خالص.. فيه حركة ترقية للموظفين في الوزارة علي الأبواب وان شاء الله اخذ وكيل وزارة بدعم و مساندة حضرتك . ياربت يا فندم أكون فيها انا داخل مكتبي .. وحكمك حضرتك اخر اليوم و اظمن سيادتك.. مع السلامة يا فندم] (يغلق الهاتف المحمول)

أستاذ سعيد : (لصابر) انت قولت بشتغل إيه يا حضرت ؟ (يدخل الهاتف في جيبه)

صابر: (يرتبك ويتلعثم) عاطل

أستاذ سعيد : (لخديجة) طيب.. أنا داخل مكتبي يا خديجة (يدعها الأستاذ سعيد ويتجه إلى مكتبه)

أنسة خديجة : حاضر يا فندم

أستاذ سعيد : تمام (يخرج)

أنسة خديجة : (لصابر) اوعي تكون مدايق من كلامه

صابر: لا .. عادي

الأنسة خديجة : ع فكرة .. المدير الحنين رزق (تقهمه)

الأنسة خديجة : صابر..ممكن تنتظر بره.. في الاستراحة.

صابر: حاضر (يخرج)

(يدخل عوض)

عوض : (يحمل صينييه أكواب الشاي ويتقدم نحو الأنسة خديجة) ايوه جاي .. واحد شاي كوبايه تيك واي .. وصايه للأستاذة خديجة .

أنسة خديجة : (تاخذ كوب الشاي) شكرا جزيلًا يا عوض.

عوض : لا شكر علي واجب.. يا استاذة

أنسة خديجة : المدير فاضي ولا لسة مشغول في المكالمات اللي بيعملها علي الصبح .. عاوزين نشوف شغلنا بقي

عوض : شوفته فاضي دلوقتي

أنسة خديجة : ماشي الحال .. علشان نبدء الانترفيو للناس اللي جت الامتحان

عوض : اروح أجب ورق الاسئلة منه .. علشان نبدء الإمتحانات التحريرية (يهم بالخروج)

أنسة خديجة : ماشي .. بسرعه بالله عليك

(تدخل عطيات)

عطيات : فين الأنسة خديجة

أنسة خديجة : أنا.. اي خدمه

عطيات : يا ختي.. قالولي انكم عاوزين ناس تشتغل.

أنسة خديجة : مين دول اللي قاللوك؟

عطيات : البت خوخه اللي شغاله في محل الكوافير اللي ع قمه الشارع.

أنسة خديجة : هي قرأت الإعلان؟

عطيات : مش هي اللي قرات الاعلان.. ديه البت فكهييه اللي شغاله عند الجماعه الهاي
لايف في العمارة اللي جنب محل الكوافير .

آنسة خديجة : (بزھق) خلاص كده عرفت.

عطيات : طيب

آنسة خديجة : أسمك إيه؟

عطيات : (تنهد) أسمي الحقيقي ولا المستعار

آنسة خديجة : مش فاهمه ؟

عطيات : (في دلع) يعني اللي في شهادة الميلاد و لا بتاع التيكيتوك والفيس والحركات.

آنسة خديجة : حركات؟!

عطيات : اعمل ايه.. مفيش شغل.. بعمل فيديوهات تيكيتوك ..نلم قرشين

آنسة خديجة : بتاع شهادة الميلاد.

عطيات :: (تضحك) إسمي الحقيقي عطيات بس قوللي سهيله.

آنسة خديجة : حاضر

عطيات : حسنتم الشغل امتي.. وحاخذ يوميه كام.

الآنسة خديجة : علي طول كده .

عطيات : مفيش شغل ولا إيه .. اوعي تكونوا نصابين.. زي بتوع شركات الأمن والنضافه.

آنسة خديجة : لا مش نصابين

عطيات : طيب الحمد لله يا ختي.. طمنتني قلبي.

آنسة خديجة : عايزة تشتغلي إيه؟

عطيات : اي حاجه تؤمري بيها.. اعمل شاي وقهوة.. اكنس وأمسح.. كده يعني.

آنسة خديجة : طيب بتعرفي تقراي وتكتبي.. يا عطيات .. اقصد سهيله

عطيات : انا شطورة.. اذكي أخواتي.. بعرف افك الخط . أه والمصحف.

آنسة خديجة : طيب استني بره شويه.

عطيات : خلاص ماشي. (تخرج)

(اظلام)

المشهد الثالث

(تفتح الإضاءة علي الانسة خديجة و يدخل راضي)

راضي : السلامو عليكم يا أبله

آنسة خديجة : (تصرخ) إيه.. بتقول إيه.. ابله .. شايفني قدامك ماسكه تباشير واقفه علي السبورة وسط الطلبة

راضي : معلش .. حقك علي رأسي .. يا ابله

آنسة خديجة : (متأثرة وبغيظ مكتوم) أستغفر الله العظيم .. انت عاوز إيه بس؟

راضي : عاوز أسأل عن إعلان الشغل ؟

آنسة خديجة : مين انت؟ .. عاوز ايه ؟

راضي : (يتحرك للأمام) انتم اللي عايزين انا مش عايز حاجه

آنسة خديجة : (بدهشة) مش فاهمه

راضي : (ببرود) انتم اتصلوا بيا.. وقولتولي في امتحان ليا النهاردة

آنسة خديجة : فهمت .. عايزه ال CV بتاعك

راضي : لآ مؤاخذه.. مش فاهم .. معرفش لغة .. ولا انجليزي ولا فرنساوي

آنسة خديجة : بتعرف إيه؟

راضي : (ببرود) بعرف أتكلم صعيدي و فلاحى وشوية علي بورسعيدي

آنسة خديجة : (بعصبية) انت جاي تهزر .. فايق ورايق باين عليك

راضي : والله ما فاهم سؤالك

آنسة خديجة : قصدي بياناتك الشخصية

راضي : (يضحك) معيش حاجه.. مش عامل حسابي (يفتش في جيوبه)

آنسة خديجة : يعني انت حاصل علي شهادة.. بتعرف تقرأ وتكتب

راضي : معاي دبلوم صنایع قسم تبريد وتكييف

آنسة خديجة : متعلم

راضي : علي قد الايد

آنسة خديجة : ع كده بتشتغل بشهادة الدبلوم الصناعي في اي ورشة او مصنع معروف

راضي : (ساخرا) هو فيه حد بيشتغل بشهادته في الزمن ده .. يا أبله

آنسة خديجة : طيب بتشتغل ايه؟

راضي : طيار درجة اولي

آنسة خديجة : ايه؟

راضي : سواق توكتوك درجة اولي

آنسة خديجة : (في تعجب) توكتوك؟!

راضي : (في برود) مش الطيار بيطيير في السما وانا بيطيير علي الارض بالركاب ..يا أبلة

كله طيران.. حمد الله علي سلامة الوصول للمطار

آنسة خديجة : يا سلام

راضي : الشغل مش عيب .. الراجل في الزمن ده اللي يعرف يجيب الجنية

آنسة خديجة : أنا مقولتش كده.. مقولتش أنه عيب ولا حرام

راضي : (باصرار) التوكتوك رزق حلال.. مش أحسن من القعدة علي القهاوي او في

البيت

آنسة خديجة : مفيش كلام احسن من كده .. هو ده عين العقل

راضي : ربك رب قلوب يا أبلة

آنسة خديجة : طيب خد ورقة و انتظر دورك

راضي : ورقة مينين ؟

آنسة خديجة : من علي المكتب ده

راضي : ماشي الكلام (يذهب إلى المكتب)

آنسة خديجة : وبعدين اقف جنب الشاب ده

راضي : (ناظرا حوله) الشاب ده .. وبعدين الكلام علي اية ؟

آنسة خديجة : طيب .. اصبر شويه يا اسطي

راضي : صح ..الصبر حلو ..لأن العجلة من الشيطان

آنسة خديجة : أعوذ بالله من الشيطان الرجيم

راضي : متقوليش.. انا متعود كده..أنا عملت فيش وتشببية في كل أقسام الشرطة و
انصورت صور شخصية بخلفية بيضا اكثر ما لقيت شغل .. ربنا مقسم الارزاق علي
عباده .. رزق امين الشرطة و كمان المصوراتي اللي علي اول شارعنا

آنسة خديجة : باذن الله.. حنبدء الاختبارات وحنوزع عليكم ورق إجابات لامتحان بتاع
الشغل

راضي : ع الله.. ربنا كريم

آنسة خديجة : عن اذنك شوية (تهم بالخروج)

راضي : رايحه فين ؟

آنسة خديجة : جايه ثاني (تخرج)

(يخفف نور المسرح في الخلفية ويسلط الضوء علي راضي)

راضي : (وكانه يحدث نفسه) طوال السنين ديه كلها بدور علي شغل .. علشان أكون
نفسي واجيب شقة أوضتين وصاله أو اوضه وصاله أو اوضه من غير صاله(هنا
يضحك ضحكة كبيرة)

.. انا اشتغلت في أشغال كثير في كل حتة عند الناس(يستمر بالضحك)

علشان اقدر اتجوز وافتح بيت .. كنت بطلع من الشغل علي الفاضي.. اشتغلت زي ما
اشتغلنش (يضحك) ومعملتش أي فلوس أعرف أتجوز بيها.. مش عارف ازاى يعني..
العيب فيا ولا العيب في صحاب الشغل.. بس هي ناقصة وجع دماغ وشيل هم .. والواحد
يعجز قبل الأوان .. وانت نازل يا حبيبي خد معاك كيس الزبالة (يضحك) .. وانت راجع يا
حبيبي اوعي تنسي العيش الفينو و اللبن الزبادي ..هات بامبرز معاك وانت جاي يا
حبيبي (يقطع ضحكتة تدريجيا)

(اظلام)

المشهد الرابع

(يضاء المسرح في نفس المكان علي الانسة خديجة وتدخل فيولا)

فيولا : صباح الخير

آنسة خديجة : صباح النور

فيولا : انا قرأيت في إعلانات الكنيسة عن وظائف متاحة.

آنسة خديجة : أهلا وسهلا

فيولا : انا فيولا .. مهندسة كمبيوتر وجرافيكس.

الآنسة خديجة : جميل جدا .

فيولا : يقولوا عليا عبقرينو .. وماما بتقولي الواد بليه.

آنسة خديجة : (تضحك) بليه ودماغه العليا.

فيولا : حصلت علي اربع شهادات و ماجستير و ٩٧ ساعة احترافيه في مجالي .

آنسة خديجة : برافو يا باشمهندس.

فيولا : بتواصل مع الشركات جوا وبر البرا البلد .. وبسلم شغلي اون لاين.

آنسة خديجة : إحنا في زمن التكنولوجيا والتقدم العلمي.

فيولا : باخد فلوس كويسه.. وتقدير محترم ومميز من الشركات ديه.

آنسة خديجة : انتي قدوة ونموذج للشباب يا فيولا .ربنا يحميكي.

فيولا : بس فيه مشكلة صغيرة كده.

آنسة خديجة : بس إيه.

فيولا : علشان انا بنت بتعرض لمشاكل كتير في الشغل بتاعي.

آنسة خديجة : زي إيه؟

فيولا : زي النصب والاحتيال من الشركات

آنسة خديجة : معقول

فيولا : وعلشان كده فكرت في حل؟

آنسة خديجة : ايه هو ؟

فيولا : الهجرة لكندا او استراليا او حتي أمريكا واشتغل هناك.. لان هناك فيه تقدير مالي ومعنوي للناس الشاطرة .

آنسة خديجة : صحيح ..فكرة كويسه.

فيولا : حلم جميل.

آنسة خديجة : ربنا يوفقك .

فيولا : بس ماما مش عايزني اسيها واسافر بره البلد.. خايفه عليا من الغربه.

آنسة خديجة : الغربه صعبه شويه

فيولا : لازم أحقق طموحي وأحلامي. وماما مش راضيه خالص.

آنسة خديجة : معلىش .. ماما بتحبك قووي .. ربنا يخليكم لبعض.

فيولا : علشان كده لما قرأيت الإعلان..قولت أسأل علي شغل هنا .. واجي اعمل انترفيو.

آنسة خديجة : حنعمل مقابلات .. كمان شويه.. ممكن تنتظري في الاستراحة.

فيولا : اوكي (تسير لتخرج)

(اظلام)

المشهد الخامس

(تفتح الإضاءة علي مشهد صابر وراضي)

صابر: السلام عليكم

راضي : (يمد يده للمصافحه لصابر) صباح الورد والياسمين يا كبير

صابر: صباح الخير

راضي : هو انت كمان جاي تقدم للوظيفة

صابر: باذن الله

راضي : (بغم ممتليء) أنا راضي

صابر: عاشت الاسامي

راضي : وأنت؟

صابر: وانا صابر

(يضحكون)

راضي : دفعت القرشين بتوع استمارة طلب الشغل

صابر : إجباري

راضي : ولعه معاهم الناس دوول

صابر: إحنا واقفين كده ليه؟

راضي: منتظرين الاتوبيس

صابر: يا سلام

راضي: (موجهه كلامه لصابر) هو احنا في مدرسة ولا إيه يا كوتش

صابر: مش عارف.. ايه الموضوع ده

راضي: هو فيها موضوع وحدوته .. الواحد ياخذ بعضه ويمشي من أولها

صابر: يا بني اهدي شوية

راضي: مش ههدي.. يا نجم الساعة معاي زي عدادات الميه و الكهريا

صابر: مش فاهم

راضي: عداد التوكتوك بيعد .. بيزنس شغال .. الركاب في الأنتظار

صابر: توكتوك؟!

راضي: هو في إيه؟ ماله التوكتوك

صابر: مفيش .. طيب هي مسألة وقت

راضي: أنا عاوز امشي من هنا

صابر: طيب ما تمشي في حد ماسك فيك

راضي: يا عم .. أنا راكن التوكتوك بتاعي علي اول الشارع صف تالت

صابر: (بهدهوء) متقلقش.. مفيش مشكلة .. شكلها إجراءات مش اكر من كده

راضي: يعني من الاخر .. حنشتغل و لا إيه .. ولا كلها فض مجالس

صابر: (في امل) شغل باذن الله

راضي: مش باين يا نجم

صابر: (بزهبق) ممكن تسكت شوية.. دماغي وجعتني .. انت بالغ راديو

راضي: خلاص حشد بلاستر

صابر: متزعلش من كلامي

راضي: خلاص مش زعلان

صابر: معلىش

راضى : سيبها على الله

صابر: ونعم بالله

راضى : (ثم وهو يقترب من مكان وقوفه) بقولك .. شكلك تعليم عالي.. باين عليك بصراحة .. ماتسافر بره البلد شوف حظك في اى أرض تانيه وللسفر سبع فوايد.. اطلع أوربا او دول الخليج ..اعمل قرشين .. القرش الأبيض ينفع في اليوم الأسود

صابر: ماشي اسافر إزاي من غير جواز سفر أو عقد عمل أو تأشيرة.. إيه حاسافر على ديل الطياره مثلا (يضحك)

راضى : أنا بقي فكرت أمشي من البلد ديه

صابر: (بقوة) ولا عمري فكرت

راضى : طيب خد دي بقي

صابر : اللهم اجعله خير

راضى : ما انا اصلي لي حكاية طويلة لو تعرفها

صابر: ارغى.. ارغى

راضى : (يتذكر ما حدث) بس يا سيدي لي صاحب كان بيشتغل معاي مندوب مبيعات في شركة حلويات بتاعت بسكوتات.. من فترة مش طويلة عرض عليا السفر بره البلد

صابر: فرصه كويسة

راضى : مش تعرف على فين ؟

صابر: اي حته تانيه .. مش حتفرق

راضى : (في تردد) الشغل في مزارع العنب في فلسطين

صابر: (في دهشة) تسافر على فين؟

راضى : أرض فلسطين

صابر: (رافضا) قصدك تشتغل مع قوات الاحتلال وتبيع القضية الفلسطينية

راضى : (في سداجة) أنا مش بتاع قضايا ومحاكم وشغل محامين

صابر: خليني ساكت أحسن

راضي : هو قالي ان ده احسن حاجة

صابر: وسمعت كلامه ع كده

راضي : غلظه وندمان عليها .. على اغنية الفنان هاني شاكر

صابر: مش غلظه ديه مصيبه

راضي : علشان من فلسطين المحتلة ندخل إسرائيل كعمال في الفلاحة

صابر: (باستغراب) بتقول ايه؟ إزاي

راضي : بتصاريح دخول وعمل يومية

صابر: يخرب بيتك

راضي : (ينظر في الأرض خجلاً) علشان نهرب علي أوروبا من حدود إسرائيل زي فكرة الهروب لأوروبا عن طريق البحر من ليبيا .

صابر: أوروبا

راضي : الفكرة هي اننا نتجوز بنت أجنبية وتكون موزة وتقيل مصنع بلدها و ناخذ الإقامة وتلعب البليه معنا.. ونعدي من الفقر بقي .

صابر: ده انتحار .. موت بطيء

راضي : بالعكس كأنه عرض احتراف زي لاعبية الكرة .. انا مش اقل من ميسى

صابر: اما الموت غرقان في البحر او الموت بعينه بطلقات البارود

راضي : (بحزن) يا عم الحاج .. أنا هنا عايش ومش عايش .. كده ميت وكده ميت.. وتعددت الأسباب والموت واحد

صابر: مش صحيح .. كلام فارغ

راضي : غصب عننا.. كنا عاوزين نساfer باي طريقة

صابر: سافرت علي كده ؟!

راضي : حضرت شنة السفر واخذ التأشيرة من السفارة الإسرائيلية علشان اعرف أدخل فلسطين

صابر: و بعدين عملت ايه؟

راضي : و لا حاجة..كبرت دماغي وكملت نمومي و مرحتش اصلا (يضحك) النوم سلطان يا معلم

صابر: كويس جدا .. ربنا بيحبك

راضي : مش كويس خالص.. اخوك شرف ثلاث ليالي في مبني الأمن الوطني

صابر: ليه ؟

راضي : قعدت شويه عندهم ..كنت في استضافه سبع نجوم .. علشان يكملوا تحقيقات معاي

صابر: كما توقعت تماما .. لعله كان خير

راضي : يا حاج .. انا بحب بلدي.. يعلن أبو العوزة اللي خلت الواحد يفكر بالطريقة دي

صابر: (بانفعال) انت انسان غريب

راضي : عارف التحقيق معاي كان أسبابه ايه

صابر: الله أعلم

راضي : علشان ماسفرتش.. وعن حوار موظفي السفارة ديه معاي

صابر: وقولت لهم ايه؟

راضي : مقولتس.. هما كانوا عارفين كل شيء.. مش محتاجين اقوال

صابر: شكلك اهيل

راضي : اهيل ديه شويه

صابر: كويس أنك عارف نفسك

راضي : هو ده اللي جري .. شوفوني عبيط سابوني اروح للبيت (ضاحكا)

صابر: تفتكر هو ده كان الحل ؟

راضي : (بحزن) دماغي راحت لكده.. بسبب المر اللي إحنا شاربينه من ساعة ما الواحد اتولد وشاف الدنيا

صابر: كنت فتح مخك.. واحسابها صح

راضي : (يزداد حزنا) مكنتش عارف اعمل ايه؟

صابر: طيب كنت اعمل مشروع صغير زي مثلا افتح كشك سجائر او اشتغل بتاع كلور وصابون سايل .. او اركب موتوسيكل او اشتغل ديليفري في مطعم او صيدلايه .. او اشتري عربية حديثة اشتغل عليها اوبرا او كريم ..

راضي: ما انا اصلي عندي حكاية طويلة لو تعرفها

صابر: تاني.. تاني

راضي: (يتذكر ما حدث) عارف يا صاحبي كنت شغال علي تاكسي اوبرا علي عربيات الناس وبحصل يومية اخر النهار حوالي ٨٠ جنية

صابر: وبعدين

(يخفف نور المسرح في الخلفية ويسلط الضوء علي راضي)

راضي: اللي كان بيحصل .. اصرف نص اليومية في علبة سجائر و سندوتش فول بزيت العربيات و بطاطس مقلية طالع عين ابوها في الزيت علي عربيه الفول وكوبايه شاى علي قهوة السواقين .. طوال الوردية .. وبعدها قولت اشتري عربيه بالقسط وخذ قرض من البنك ب ٦٠ ألف جنية يرجع فوايد للبنك في عشر سنين طويلة ١٢٠ ألف جنية .. ضعف قيمة القرض زي رجال الأعمال

صابر: وبعدين .. كمل

راضي: اول شهر كان زي الفل دفعت قسط العربية وقسط البنك .. والشهر الثاني العربية عملت حادثه و دخلتها صيانة.. واتكعبلت

صابر: وعملت إيه في العربية ؟

راضي: بقيت متعثر .. مقدرش اكمل .. رجعت العربية لصاحبها و لبست قسط القرض ١٠ سنين جايه وركبت علي توكتوك (وهو يبكي)

(يضاء المسرح في نفس المكان)

صابر: ربنا يعينك

راضي: يارب يقدرني اسدده

صابر: كلنا في الهوا سوا

راضي: عارف اللي مزعلني .. اني معرفتش أهرب بره البلد زي رجال الأعمال من البنك زي بتوع اليومين دوول.

صابر: المره الجايه

راضي : أصل أنا وش فقر

صابر : عيني على الشباب فيكي يا بلد

(اظلام)

المشهد السادس

(نفس الديكور السابق)

آنسة خديجة : (تنادي) يا عوض .. يا عم عوض.

عوض : ست البنات

آنسة خديجة : دخل الشباب من بره.

عوض : (من الخارج) حاضر.

(يدخل الشباب والبنات و يظهر عوض ومعه دوسيه ممتليء)

آنسة خديجة : عاوزه الصبيان يا عوض .. خليم الاول

عوض : والبنات يا استاذة.

آنسة خديجة : (للبنات هيفه و عطيات وفيولا) حنتصل ببيكم في أقرب وقت ممكن.

هيفه : طب نعمل ايه يعني؟

آنسة خديجة : معلش يا بنات .. لما نطلب تاني ح تكونوا اول الناس .. ان شاء الله.

فيولا : امتي؟

عطيات : موت يا حمار.

آنسة خديجة : متزعلوش يا بنات

عطيات : (في قرف) رضينا بالهم يا ختي ..والهم مش راضي بينا .. حشوف عقد عمل في

السعودية او دبي.. بلا قرف

فيولا : (في تحدى) و انا ح سافر خلاص لامريكا وحاخذ ماما والعيله كلها معاي.

هيفه : طيب انتي رايجه أمريكا..وانتي رايجه دبي.. انا اروح فين .. اعمل إيه؟ (في حيرة)

لسه تاني ح دور ع شغل.

عوض : (لهيفه) اتجوزي واعقدي في البيت

هيفه : صح الكلام.. جبت من الاخر يا حاج .. سلام (يخرج البنات ويبقي عوض و صابر وراضي و خديجة)

أنسة خديجة : (لعوض) وزع عليهم ورق الإجابات (يسلم عوض ورق الاجابات ل صابر وراضي)

عوض : (بيده بعض الأوراق) اتفضلي حضرتك نماذج الاسئلة (يسلم لخديجة ورق الأسئلة)

أنسة خديجة : (توجه كلامها لصابر وراضي) جاهزين ولا لسه شويه .. يا شباب للامتحان

صابر : جاهزين ان شاء الله

راضي : يا لاينا

(يجلسان إلى الطاولة ويبدأن في الكتابة بينما تجوب الانسة خديجة وهي تملي الأسئلة)

أنسة خديجة : يا لاينا نبدء إختبار الحساب يا شباب

صابر وراضي : (في صوت واحد) ماشى

أنسة خديجة : (تنظر إلي ورق الأسئلة وتقرأ)

$$= 1+1$$

$$= 7 \times 5$$

$$= 4 \div 16$$

$$= 3_9$$

(صمت قصير جدا)

راضي : زي الفل .. الكرة ديه جت في ملعبى .. مش باخد فلوس التوصيل من الركاب معاى في التوكتوك.. كاشير علي ميه بيضا

صابر: (يضحك) انت صح كلامك .. بصراحة انا كنت فاشل في الحساب.. علشان كنت درست ثانوية عامة أدبي مش علمي رياضه

الانسة خديجة : خلاص .. نبدء إمتحان الكتابة

أكمل الجمل الآتية بالكلمات المناسبة.

- ١- من الاعمال التي يقوم بها النجار.....
- ٢- من الأدوات التي تستخدم لحل مشكلات في الكهرباء.....
- ٣- في الفنادق يعتبر الترحيب بالزوار والعملاء من مهام.....
- ٤- تتكون الاسرة من الاب والام و.....

(صمت قصير جدا)

أنسة خديجة : (تنادى) يا عم عوض .. عم عوض

عوض : نعم يا استاذة

أنسة خديجة : وزع علي صابر وراضي أقصوصة من الجورنال اللي معاك النهاردة علشان
نمتحن الشباب في القراءة

عوض : (يعطي أقصوصة من الجورنال لصابر)

صابر : (يأخذ الجورنال و يبدء يقرأ) تراجعت معدلات البطالة في مصر بـ ٠.٥% على
أساس سنوي لتصل إلى ٧.٤% في ٢٠٢١ ، وذلك بحسب الجهاز المركزي للتعبئة العامة
والإحصاء (يعطي الاقصوصة لراضي)

راضي : (يأخذ الجورنال و يبدء يقرأ) القوى العاملة تعلن توفير ٤٢٠٠ فرصة عمل
برواتب تصل إلى ٥ آلاف جنيه

(صمت قصير جدا)

أنسة خديجة : الله ينور يا شباب .. انتهت الأسئلة بسلام

(يدخل أستاذ سعيد)

استاذ سعيد : (بعصبية) يا عوض.. انت فين يا زفت

عوض : ايوه ايوه .. يا استاذ سعيد

أستاذ سعيد : فين القهوة يا عوض.. في ثابيه الاقي القهوة بتاعتي

عوض : حاضر يا استاذ سعيد (يخرج)

استاذ سعيد : (موجه كلامه الي الأنسة خديجة) إزاي الحال

أنسة خديجة : زى الفل.. كله ماشى زى الساعة

استاذ سعيد : علي فكرة الشفافية والنزاهة في الامتحانات النهائية شيء ضروري.. يا خديجة

الانسة خديجة : طبعاً عارفه ..حضرتك

أستاذ سعيد : (يقترب من اول المسرح في الوسط) دلوقتي مفيش موضوع المحسوبية (بلهجة خطابية) التعيينات بقت بمعايير ومؤشرات وتقييم واضح وبدرجات ويشرف عليه الشركة القابضة ودعم النزاهة والأمن لضمان نزاهة الإجراءات ..

الانسة خديجة : طبعاً ..

استاذ سعيد : كل ده علشان تحقيق العدالة وتكافؤ الفرص في نتائج الإمتحانات للمتقدمين للشغل

أنسة خديجة : علم وينفذ يا ريس

استاذ سعيد : (لراضي) انت مالك مش علي بعضك ؟

راضي : لا .. في العادي

استاذ سعيد : (ضاحكا) انت شكلك مش تمام خالص

راضي : مش فاهم تقصد إيه حضرتك

استاذ سعيد : انت قلقان شويه .. صح

راضي : (بقوة) انا زي الفل يا استاذنا

استاذ سعيد : (وهو يطبب عليه) أخبار الإمتحان إيه ؟.. سهل ولا صعب؟

راضي : مفيش اسهل من كده .. زي السكين في الحلوة.. يا استاذنا

استاذ سعيد : كويس جدا جدا (يوجه كلامه لصابر وراضي) علي فكرة اي حد منكم في مشكلة معاه او عايز يقدم شكوي او يقول اي اقتراح .. باب مكتمي مفتوح للجميع ..(لصابر) ولو عندك شكوي أو تظلم تقدر تظلم بكافة الطرق بداخل الشركة أو خارجها واتظمن حقك حيوصلك أكيد.

صابر: اللهم اجلعي نصيب فيها .. وربنا يبارك في اللجنه المحترمه كان يوم جميل

أنسة خديجة : يالا .. كفاية .. الوقت خلص (تأخذ ورق الاجابات) خلاص بقي

استاذ سعيد : متشكرين يا حضرات

راضي : تسلم يا معالي الباشا

صابر: شكرا يا فندم

استاذ سعيد : لا شكر علي واجب.. انتم زي ولادي ..موفقين باذن الله

آنسة خديجة : تأمر بشيء تانى .. يا ريس

استاذ سعيد : اه .. عاوزك تيجي معاي مكتبي تراجع شويه اوراق في بوسطة الصادر والوارد بتاعنا

آنسة خديجة : تؤمر حضرتك (يخرج أستاذ سعيد و خديجة)

(يدخل عوض)

صابر : (لعوض) وناويين تعملوا فينا اية بعد كدة؟

راضي : ماتخلصونا يا جماعة

عوض : صلوا علي النبي .. كله بالصبر .. الصبر مفتاح الفرج

راضي : اللهم صلي عليك يا نبي

عوض : (لراضي) انت مشاكس وبتاع مشاكل

راضي : (بصوت الممثل عادل امام) أنا رجل غلبان

عوض : انت واحد غلباوي

راضي : (يمد له علبة السجائر، يتناول سيجارة، يشعل عود ثقاب ويحمله له ثم يلتقط

سيجارة ويشعلها). تشرب شاي بالنعناع ولا بالياسمين يا عمنا

عوض : (يجذبه رغم عنه) أنا بتاع الشاي والقهوة.. جاي تبيع الميه في حارة الساقين

راضي : طلباتك أوامر.. سيف علي رقبتى

عوض : وانا بقولك عاوز ايه؟

راضي : زق معانا شويه

عوض : مش فاهم قصدك

راضي : خليك صاحي للكلام

عوض : طيب ما تقول

راضي : (يزفر الدخان) نفتح درج للمكتب ونرش المسؤول ونعدي من الإمتحان .. وكله

بالحب

عوض : وش كده

راضي : من الآخر.. من غير لف ودوران

عوض : مينفعش

راضي : اللي يتكسف من بنت عمه ميجيبش منها عيال ..

عوض : اتلم يا واد

راضي : وعاوزين نشتغل ونجيب عيال

عوض : أنا مش مسؤول.. العنوان غلط

راضي : طيب شوف كده ايه الكلام (يسود صمت)

عوض : (لصابر) وانت مش جاي في المصلحة ديه ؟

صابر: أنا مليش دعوة بالحوار ده

راضي : ليه كده .. بتبيع علي طول

صابر: إيه اللي انت بتعمله ده ؟

راضي : فتح عينك .. تأكل ملبن

صابر: مش ممكن

راضي : كبر الجمجمه

صابر: انت فاكر ان مفيش حد واخذ باله

راضي : خليك أنت عايش في ميه البطيخ

صابر: أنت باين مش حتجها لبر

راضي : صح النوم يا أخ

(تدخل الأنسة خديجة)

أنسة خديجة : (لعوض) اتاكديا عم علي ان ورق الإجابات مكتوب علي كل ورقه اسم كل واحد .. ودخل ورق الإجابات للمدير في مكتبه

عوض : علم وينفذ يا استاذة

(يخرج عوض ومعه ورق الاجابات)

راضي : (لصابر) عملت ايه في الامتحان يا كوتش ؟

صابر: (بسخرية) الأسئلة جايه من بره المنهج .. هو ده يتقال عليه إمتحان

راضي : ربنا معاك (يضحك)

صابر : يساعد الكل ربنا

راضي : معرفتش اغش الإجابات منك يا محترم .كنت بناادي عليك طول الوقت .. علشان

ترمي عليا اي إجابة سؤال في الزحمة

صابر: أنا مسمعتش حاجة؟

راضي : مش مهم .. علي كده نجحنا

صابر : ممكن

راضي : من يعرف

صابر: لعل وعسى

(اظلام)

المشهد السابع

(تفتح الإضاءة علي خديجة و تدخل فتاة في العشرين من عمرها حديثه التخرج بمظهر

من توضح ملابسها انها من أسرة غنية)

شيري : صباح الخير

أنسة خديجة : صباح النور

شيري : (تنظر للمكان) السيد المدير في مكتبه ؟

أنسة خديجة : (باستغراب) مين حضرتك ؟

شيري : (بصوت ناعم) مفيش لزوم .

أنسة خديجة : يعني إيه؟

شيري : ممكن تخلي الساعي يبلغه بوجودي.

أنسة خديجة : اقوله مين؟

شيري : (بنبرة متعالية) هو عارف مين انا ؟.. و جايه من طرف مين ؟

أنسة خديجة : انتي جايه علشان الاعلان ؟

شيرى : إعلان ايه؟

أنسة خديجة : علشان الوظيفة !؟

شيرى : (في تأكيد) اه .. جايه علشان الوظيفة.

أنسة خديجة : يا تري المؤهل ايه؟

شيرى : انا خريجه الاكاديمية .

أنسة خديجة : مش مهم خالص المؤهل .. كلها شكليات.

شيرى : أوكي

أنسة خديجة : طيب .. أقوله مين الأنسة ؟

شيرى : قوليله شيرى بس .. هو يعرف علي طول .

أنسة خديجة : بجد ؟!

شيرى : دادى .. كان لسه مكلمه في التليفون.

أنسة خديجة : حاضر .. دقيقة واحدة .. حدخل ابلغه بنفسى (وتخرج)

صابر : سرحان في ايه ؟

راضي : ابدأ .. مفيش حاجة (ينظر الى شيرى نظرات حمدي الوزير)

صابر : مش باين .

راضي : حاسس ان فيه حاجة مش طبيعية

صابر : باين كده .

راضي : والله أعلم .

صابر : فيه ايه؟

راضي : احنا بنضيع يا بديع .

صابر : انا شايف كده .

راضي : (لشيرى) أهلا بالقمرايه.

شيرى : أهلا .

راضي : قال يا قاعدين يكيّفكم شر اللي جاين.

صابر: (ينظر للسماء داعيا) ربنا يعديها علي خير .

راضي : (مقاطعا) باين علي رأسها ريشه

صابر: وأحنا مالنا يا عم .

راضي : وأحنا مالنا إزاي .

صابر: خرينا في حالنا .

راضي : (يقف خلف شيري) شكلها بت فرفوره .. الهدوم اللي لابسها نضيفه جايه

من الداري كلين .. اللبس بتاعها شكله مستورد من بره .. مش زينا ياعم الحاج

صابر: انت بتقول اي كلام وخلص .

راضي : شكلها بت ناس هاي كلاس.. اما احنا ولاد كلب .

صابر: بالعكس زينا .. جايه علشان الوظيفة المطلوبه زينا بالضبط .. مفيش فرق بينا.

راضي : (يضحك) الفرق في البنطلون عند مكوجي العائلات.

شيري : (تنظر لهم باستغراب) سمعت كلامك.. خليك مؤدب .. بعد إذتك لو سمحت.

راضي : (لشيري) بتقولي ايه يا عسلايه ؟

شيري : بلاش قلّه أدب.

راضي : شكله النهاردة مش حيعدي علي خير .

صابر: (يصيح) انت بتعمل ايه..

راضي : ده بت ملهاش اي تلاتين لازمه .

شيري : ناس اندر جروند.

صابر: (لراضي) انت عاوز تعمل مشكلة مع اي حد

راضي : (يصيح فجاءه كالمجنون) كده كده مش فارقة.. احمد زي الحاج احمد .. بالعكس

جوا السجن مش حنشوف الأثكال ديه اللي خربت البلد .. وبقت ناس عايشة في عالم

سمسم وناس تانيه مش عايشة خالص

شيري : احترم نفسك بلاش غلط .

راضي : انت عامله فيها نجمة سيما كده ليه؟ فاكره نفسك ياسمين عبدالعزيز ولا مني زكي.

شيرى : بتقول إيه يا خفيف؟

صابر: كفايه بقي.

شيرى : أنتم عاوزين إيه بالظبط ؟

راضي : اللهم ما طولك يا روح.

صابر: (يشد ذراع راضي بعنف) مش عايزين مشاكل مع حد .. ديه مهما كان بنت .. عيب عليك اللي بتعمله ميصحش.

(تدخل الأنسة خديجة)

أنسة خديجة : هدوء من فضلكم.

صابر: حاضر.

راضي : النتيجة هتبان امتا لوسمحتي.. علشان جبت جاز

أنسة خديجة : ثواني يا شباب.. عاوزه أقول حاجه

صابر: اتفضلي حضرتك

أنسة خديجة : للأسف لم ينجح احد في الإمتحان النهاردة (تضحك ضحكة مكتومة)

صابر: فيه حاجه غلط

راضي : (بحزن) متقلقش يا صابر هيا الكوسة غاليت من شوية عشان شغل المستخبي

أنسة خديجة : ولكن.. حرصا من الشركة لحسن سير العمل ولصالحه وتحقيق العدالة وتكافؤ الفرص (تشير المهم فيلثفتون حولها) تم اختيار الشخص المناسب من السلطة المختصة.

راضي : سقف يا جدع

أنسة خديجة : (توجه كلامها لشيرى) ألف مليون مبروك يا أنسة وبالتوفيق ان شاء الله ليكي . واهلا بيكي معانا في الوزارة (تمد يدها لتسلم عليها)

شيرى : ميرسي لندوئك

أنسة خديجة : (في برود ولا تبالي) العفو

راضي : (يثور) لا مش من حقها

آنسة خديجة : قصدك ايه مش من حقها.

راضي : كده .. مش من حقها

آنسة خديجة : إحنا اللي شايفين.

صابر : اه .. مش من حقها

آنسة خديجة : ليه مش من حقها .

راضي : كلنا شايفين انه مش حقها .

شيري : أتكلم عن نفسك بس.. يا انت.

(يتبادل صابر وراضي النظر لبعضهم ثم ينظرون لها)

راضي : أنا لا مؤاخذة مش عبيط .. ولا مختوم علي قفايا

صابر: (مصدوم) مش معقول.. ازاي ده حصل؟

راضي : (صارخا) يا نهار ألوان.

آنسة خديجة : معلش يا شباب.

راضي : (متعجب من رد فعل خديجة) من غير مقابلات شخصية لينا .. بيتهيألي فيه

حاجه غلط (يدخل الجميع في نقاش وتتداخل الاصوات)

صابر: (في مرارة) أنا لا يمكن اسمح بالمهزله دي .

آنسة خديجة : انت بتقول إيه انت؟

راضي : (في ثورة وحده) علي جثي ان الكلام ده يحصل

آنسة خديجة : الهدوء يا حضرات .

صابر: (محاولاً التلطف) أنا مقولتش كلام يزعل حد مني.

آنسة خديجة : (بهدهوء) الاعتراض مقبول.

راضي : (بغضب) مالووش لازمه الشوو ده انتو بتوظفو ابناء العاملين واخوات الموظفين

والموظفات معاكم.. يعني اسرة مع بعضيكم....بتعتبرو ان الشركه من املاككم العائليه...

آنسة خديجة : مش عجبك .. روح اشتيكي

صابر: (في رضوخ) خلاص اللي تشوفوه حضراتكم .

انسة خديجة : معلىش تتعوض المره الجايه (تغيير اتجاهها لتخرج من الباب)

شيرى : باي باي (تتبعها و تختفي في الكواليس معها)

راضى : (بسخرية) نفسي اشوفلك موقف قووي.

صابر: (لراضى) انت بنته .

راضى : لا

صابر : عندك اي أنوئه .

راضى : ياريت

صابر: عندك بابا وماما

راضى : ابوي في السجن و امي ماتت.

صابر: يعني مقطوع من الشجرة.

راضى : (بمرارة) مفيش شجرة من اساسه .

صابر: انت من أبناء العاملين؟

راضى : لا

صابر: معاك واسطه

راضى : منين

صابر: تعرف عضو مجلس شعب ؟

راضى : معرفش

صابر : أو سكرتير في مجلس محلي ؟

راضى : معرفش

صابر: تعرف مين ؟

راضى : أعرف امين شرطة في المرور

صابر : ينفع ؟

راضى : كلها حكومة في بعض.. عيله واحده

صابر: معاك فلوس تدفع ؟

راضي : معيش

صابر: يا صديقي ..اللي معوش ميلزمهوش

راضي : (فى ملل وقرف) يعني تقصد شاي بالياسمين .. علشان تشتغل في اي مصلحة او شركة

صابر: هو لسه انت عارف دلوقتي؟

راضي : اصل كنت مسافر بره ولسه راجع حالا (ضاحكا)

صابر: حمد الله على السلامة

راضي : يعني رشا بتسلم عليك يا حج (ضاحكا)

صابر: مش رشا .. تقصد شيري ضحكت علينا كلنا.

راضي : (باستسلام) ع الله

صابر: متزعلش

راضي : عادي .. كله بيطلع في الغسيل

صابر : لا حول ولا قوة إلا بالله العظيم

راضي : يعني حنعمل إيه دلوقتي.

صابر: وديه عايزه سؤال .

راضي : نعمل نفسنا من بنها البلد .

صابر: (في سخرية) بنها البلد ولا بنها الشاطيء .

راضي : كليها بنها .. كله محصل بعضه .

صابر: (باستسلام) أنا صابر .

راضي : وانا راضي . (يحتضنان)

(إطفاء تدريجي عدا بقعه الضوء علي صابر وراضي)

صابر: (في تأثر) أنا صابر بس مكنتش أبدأ راضي

راضي : حد فاهم حاجة (بهرش في راسه)

صابر: (يجلس علي الأرض وهو يضحك) اعمل نفسك حمار وانت فاهم احسن ما تعمل
بتفهم وانت اساسا حمار. (موسيقي حزينة)

(اظلام)

(ستار)

بسام حسن محمد

(النص متاح للتحميل والقراءة مجاناً ولايجوز العرض او النشر او الاقتباس إلا بموافقة كتابية من المؤلف
او إتفاق مسبق ..)

مصر- الإسكندرية ٢٠٢٣

للتواصل :-

bassam19111980@gmail. Com/□

٠١٢٠٨٤٥٩٠٠٩/□